

冲庵顧先生撫遼奏議

冲菴顧先生撫遼奏議卷之七

通州 益卿顧養謙著

疏

率官軍謝加餉

奏為感激

天恩恭率官軍陳

謝事萬曆十四年十月初四日准兵部咨為極危
孤鎮邊長虜衆兵寡餉薄恭

進圖說懇乞

聖明御覽

特賜宸斷以遺久安事該本部會同戶部覆議遼左連年虜患諸軍士咸效死力督撫按臣請乞增餉亦出萬不得已合無量為酌處該戶部增餉銀七萬四千三百八十兩六分二釐五毫兵部增馬價銀四萬七千八百七十五兩其復州添設叅將一員蓋州添設備禦一員本部查舉相應官員請

旨簡用等因題奉

聖旨遼鎮軍士防戰艱苦委當優恤這餉銀馬價准照數增發還著督撫等官稽覈樽節務使軍需

實惠其餘俱依擬欽此備咨前來臣即欽遵督率官軍望

闕叩頭謝

恩除一體遵照施行外臣竊惟遼左軍餉之薄其所從來具載臣前疏中先是撫臣屢請

皇上屢俞雖加而不能驟多則以其初本太薄也嗣是督撫科臣非不有所陳

請建白而當事之臣計

內帑盈縮重出納輒從中持之或盱衡厲色而議其後遂使

湛恩不流而遼人坐困非一日矣是以在事之臣徒
有蒿目苦心憂遼事之不可為付之無可柰何
而鉗口結舌不敢復以餉為言者有由然也非
皇上不欲加而前此諸臣不能

請也今幸

皇上始終注念遼士之苦

不厭臣等之言下之兩部而輔臣及主計本兵之
臣同心體

國採在

廷之輿論破積習之拘攣而委曲取給於

帑藏無贏之日用以生全遼人普

皇恩而慰

聖衷誠所謂千載一時也雖戶部之所增不能盡如
臣等之所

請而

請十得五業已周其所急以遼士之困苟益錙銖亦
足相濟而况歲益以七萬四千有奇乎况又省
朋銀而增馬價乎譬之涸轍之魚相濡以沫猶
可以緩死湏臾而况決之以西江之水也是以
聞

命之日將士歡聲動地不啻若投醪挾纊也者夫古
稱投醪挾纊者非真有醪與纊也而其感若此
况歲與之以無窮之醪與纊乎故首厚家丁以
免攀報則既足以酬勞鼓勇而河以東農商自
給之家可高枕矣實所以培全遼之元氣也次
厚選鋒以恤調操則既足以慰其遠調之勞且
可以為招補之地漸變調操之法使河東選鋒
各歸其伍以實開原遼瀋之間而杜將領奪甲
奪馬之漂說是使臣可藉手調停而兩河俱利
也南衛設將練兵而稍加之餉則腹心可保矣

冬防復何虞乎全遼之士槩加賞以二錢視月
餉四錢是又加半月之餉矣秋毫非

帝力乎至於馬價之增既省朋銀而陰益於餉之內
又免買馬而明寬於例之外

澤普諸軍而有馬者且不累及其族矣此將士所以
歡欣鼓舞而人人願效死以報

皇上者也然臣則猶有說焉遼左以彈丸之地外逼
強胡內忍積困譬諸尪羸之人元精內耗邪氣
外侵奄奄待命於旦夕之間急目前不得不投
祛邪之劑以治其標則將帥禦侮者之事也計

又遠不得不守調中之法以固其本則臣等拊
楯者之事也事不得越俎而相代較然明矣臣
是以於向者力戰之功不願分居其功名而必
亟亟以餉為

請者蓋欲生遼人於死法中以自塞其責誠不忍徼
一身盈眚之福而忘全遼溢世之害也故向以
戰功而倖

恩臣感

恩而有餘媿今以餉薄而得

請臣感

恩而有餘榮使臣不終負因人成事之媿而有言聽計從之榮是

皇上所以待臣者加於人一等矣臣有不罄涓埃之誠竭狗馬之力於向所謂戰守彼已之間以報皇上

知遇之

恩於萬一者哉此則臣之私也

特恩殊遇臣與遼人感激之衷皆有所不容已者是
以述將士之情明安攘之故以仰慰

皇上東顧之憂而自鳴其私者如此臣無任瞻

天仰

聖踊躍誦禱之至為此具本奏

聞

虜賊屢次大犯官軍出奇獲功

題為虜賊屢次大舉入犯官軍奮勇拒堵保全城堡併出奇獲功事萬曆十四年十月十一日據分巡遼海東寧道兼理廣寧等處兵備山東布政使司右布政使任天祚呈據坐營中軍金承武報稱案照本年九月二十等日節蒙兵部軍門撫鎮咨文牌案節據臺頭石門等路叅將王輓等并本鎮鎮靜等堡守備劉崇正等各稟據哨夜回鄉探報東西虜酋以兒鄧黑石炭黃台吉抄花把兔兒等并土蠻男卜言太主糾會聚

兵一稱聚兵六七萬要搶廣寧錦義寧前等處
一稱水淺犯搶河東水深犯搶河西原殺他三
箇達子地方報讐一稱大小頭兒二十箇聚兵
七八萬隨帶攻尅臺圍鈎梯於十月初一日都
到地名烏峯塔一二日進搶等因預蒙撫鎮衙
門會將正兵等營副叅遊備等官李興等各帶
領兵馬赴錦義寧前等城堡驛鋪聯絡駐防仍
行各路副叅遊守備禦等官加謹哨備收斂人
畜并各城關臺圍添撥火器火箭防禦本年十
月初五日巳時據管正安堡遊擊事副總兵姚

大節差夜不收劉景節等報稱達賊約有七八萬騎於本日卯時從鎮夷堡下韓口沙河營小附馬營等臺空進入至巳時方纔進畢先有達賊三千餘騎攻圍本堡當有設防降夷千總高良弼同守堡陳衛國拒堵降夷肅漢斬獲酋首班卜賴一顆後有達賊七八萬四面齊攻官軍戰至申時退往西南昶家屯下營初六日辰時臺營南下本日亥時鎮守李總兵遣家丁降夷尾賊探剿斬獲首級二顆義州管叅將事遊擊黑雲龍預差百總楊繼昂等赴開州等屯截殺

斬獲首級二顆初六初七初八三日前賊攻衝
戚家堡說務要攻了設防副總兵李平胡督率
千把總守堡李繼武金印周勅等官軍家丁連
日各用槍炮火箭弓箭壘石射打斬獲首級一
顆李總兵因本堡危急隨將各處設防副叅遊
擊塗廣等兵馬調赴本堡併防初九日辰時前
賊因見李總兵等及寧前叅遊李維藩等各兵
馬南北堵遏灰塵大起改從大寧堡于杲營等
臺出境大安堡設防把總趙良俊并叅將塗寬
各差人擺撥巡瞭遇零賊對敵各斬獲首級一

穎至酉時方纔出絕各營官丁降夷共斬獲首級八顆得獲達馬八匹并盔甲臂手夷器等件陣亡軍丁李景栢等六名虜去走報夜不收一名蕭清射死墩軍一名何來保被傷夷丁奴木賴等二十九名射死官馬一十匹賊由劉溫等屯攻臺射死看家男子臧以太等三十三名虜去郭義州等四名燒燬草房四百一十間吃馱雜糧一千三百餘石等因到臣又據分守邊備右叅政栗在庭呈准遼陽副總兵楊燮手本開稱差千總馬九臯等督同降夷阿卜當等家丁

楊萬里等一百名于本月初十日從瀋陽十方寺堡出境哨探至本日申時到於地名夾山迤北離邊約有百十餘里哨見達賊七八十騎即來迎敵各夷丁奮不顧身向前混斫鏖戰良久前賊退走斬獲首級二十七顆得獲達馬二十七匹盔甲一十九頂副及夷器等件夷丁阿卜當等改從別路轉至原過河口用船擺渡於十一日寅時分進境及查在陣被傷家丁阿都赤等七名射死官馬一匹射傷官馬一十八匹等情亦呈報到臣據此查本年六月十九日據

整飭寧前兵備右叅政劉易從稟據駐劄中左
所寧遠備禦楊四維呈本月十五日辰時虜賊
約有三千餘騎從鄰境錦州大興堡地方進入
楊四維聞報恐賊攻犯高橋鋪當差人分投走
報量留步軍守城一面統領官兵家丁馳至本
鋪與同設防把總徐義合營時有楊僉書西行
比杏山驛設防正兵營叅將李興帶領兵馬迎
護至杏山西七里河臺聞報當撥把總張國臣
護守楊僉書存住本臺李興統兵亦至併力與
賊接戰斫射一處前賊即分別二枝一枝徑撲

中左所東關門一枝在青石觜山劄營照應兩路賊見連山驛設防遊擊塗廣馳至所西門外姚河山寧遠叅將李維藩并曹莊驛設防遊擊胡尚忠各領兵馬聯絡馳至未敢逼城散搶即歸青石觜山團結東枝賊正戰間當有北路錦州地方錦昌堡設防正兵營叅將李寧錦州叅將李文芹各領兵馬亦至賊見官兵勇猛又見援兵四集不敢戀戰收兵圍營回奔原路出境查得在陣楊四維營斬首三顆得獲達馬一十三匹并夷器等件陣亡軍丁張達子等二名被

傷軍丁一十五名射死官馬二十三匹射傷七匹又虜去瞭山軍士三名殺死二名李興營斬首一顆得獲達馬五匹陣亡家丁陳一忠等五名被傷官丁七員名射死官馬三十八匹等因又據分巡道布政使任天祚稟准錦州叅將李文芹手本開稱本年九月初七日申時達賊十餘騎突至大福堡塔兒山空牆下撲虜取水墩軍朱學去訖當有錦昌堡設防正兵營哨探千總高良弼聞報選差降夷吳得功等三十八名跟踪出境襲至地名大虹螺山迤南離牆五十

餘里至初八日未時趕上前賊卜哈脫力庫就陣斬首二顆得獲達馬二匹救回虜去墩軍朱學射死官馬二匹等因又據本道稟據叅將李文芹報稱本月十六日寅時達賊約有五六千騎馳奔大鎮堡大遶長山南空進入往東行走當即差人分投走報後有達賊五六千騎跟踪亦從長山南空進入俱奔錦州攻衝四門三千餘騎先至西門一擁衝斫有設防副總兵李平胡李得全督令千把總李繼武等督率家丁拒堵三千餘騎攻衝南門并東南巷口副總兵李

寧領千總李尚仁等督率家丁拒堵三千餘騎
攻衝東門并壯巷口副總兵李興領千總金尚
禮等督兵各持刀向前連斫數陣二千餘騎攻
衝壯門并三官廟巷口本職帶領中軍千把總
趙寅等督令官軍家丁拒戰比各門官軍家丁
各用弓矢槍刀射斫數陣射死達賊數多不及
割首俱拉去訖賊見我兵猛勇自寅至午四面
各不能前攻方纔圍營回至教軍場將演武廳
燒燬賊見各路兵馬灰塵相繼馳奔前來於未
時仍從原路出境鎮守李總兵統領兵馬馳至

閭陽驛據報賊已出境亦回城訖及查在陣李
興營家丁虎刺哈赤斬獲首級一顆各營得獲
達馬五匹鉤槍六杆弓三張撒袋一副射死家
丁于國賢等四名并官馬三十七匹射傷官軍
家丁伯戶等三十二員名并官馬二匹等因到
臣據此已經節次揭報兵部軍門訖今據前因
除將被殺被傷官丁給與優恤湯藥得獲達馬
夷器俱給原獲之人充賞節次斬獲首級行令
解赴巡按衙門紀驗地方有無別項失事仍行
該道查勘又恐虜賊未滿其欲必圖復犯仍嚴

行各該道將加謹防備外臣會同總督薊遼保定等處軍務兼理糧餉都察院右都御史兼兵部右侍郎王鎮守總兵官太保兼太子太保寧遠伯李議照我兵出塞擊虜必選輕

銳輕銳必以衆退無顧戀而進有功名則將士必敢戰其勢在我而虜受敵故每有奇功功在戰勝虜大舉壓境而來不能禁其野掠而所在城堡皆危其急在收保收保不得不分兵兵分則益寡其勢在虜而我受敵故難以收捕斬之功功在守固其勢然也廣寧正營之兵雖以萬

計而精銳敢戰者才七千餘人耳一聞關西傳報度其急在河西則河西小大城堡不能不仰營兵為守多不過數百人少則數十人且不能遍而正營之兵一分輒盡臣於頃者請餉䟽中言之詳矣使其置城堡不守聚萬衆而決於一戰不無首功可稱而虜得乘我之虛或陷我一城破我一堡則其得失孰多有如衆寡不敵而損我精銳者則軍氣必不復振而後且難支矣此所謂彼己之間不可不審其機宜當論守難論戰也則遼左虜衆兵寡之故也況乎遼左之

守以老弱列城上助軍聲將領率甲士列城外
與虜接戰保關廂又以戰為守也今歲之虜自
二月大創之後為謀益深六月盛暑度我無備
則以三千騎入錦州南襲高橋而大帥若有前
知度河東稍寬已先調還營兵之東防者西為
備而李興在高橋非興與金尚禮以四百人背
城殊死戰則高橋幾不保而虜見兵寡攻益力
士馬且疲非李寧以五百騎赴急則李興且不
免楊四維率其卒才二百餘人耳而斬虜驍騎
益振軍聲虜大失利去是時中府僉書楊四畏

方携其家以西道遇虜賴興寧得全即行李無所失四畏今在

京師當不沒兩將批難功而虜所死傷甚衆則薊鎮哨夜得之虜中者也嗣是九月則虜馬益肥糾聚益衆先以輕騎虜我墩軍意欲得我虛實為入犯錦州計而高良弼以降夷追斬二賊奪所虜墩軍以還及擁萬餘騎猝至而攻錦州錦州業先有備虜又大失利去非李平胡李寧李興殊死戰則關廂必不守而城且危而李得全李尚仁大力馬虜再入再失利於是東西諸

苗會合益衆衆至八萬餘索馳萬餘以備負所
虜資糧則關西之報日至而本兵軍門飛檄晝
夜東馳矣乃留千人以戰車四百兩載火器列
廣寧城門外當孔道籍城中壯丁乘城守而益
發兵錦義寧前之間大帥身所統為援者不過
五百騎耳有虜中脫歸男子王蔣兩小廝者言
虜挾攻城之具謀攻我城堡圯不治者必連破
大城居內地十日乃還蓋知夏秋雨甚城堡多
頽歆承我之敵而不知處處皆新矣虜入果急
攻鎮夷堡鎮夷堡官陳衛國修其城堅甚虜不

能克而高良弼率降夷百五十騎格虜降夷肅
漢斬其一酋虜乃引兵而南其明日攻戚家堡
堡官周勅修其城亦堅三日不能克則以李平
胡率李繼武等三百人力戰故然非金印以火
器中虜虜不數却而李寧塗寬塗廣乘夜衝虜
圍入堡為援功亦不細虜知我援兵至遂解圍
去而寧前諸將援兵數千人集於南大帥收傍
近分防兵數千人逼於壯虜是以南不敢深入
錦州寧遠壯不敢復出廣寧故道近就義州邊
出塞而去矣塞閱其橐駝皆空歸所畧不過凌

河以西近邊村屯而收保甚預老幼婦女一無
所畧又以歲侵屯民所獲不過十一二已半入
城堡其愚而憚負載者輒埋糧地中虜過悉掘
地食之且盡而焚燒其屋廬惟賊家屯者屯民
自築土堡中為臺圈高堅可守屯民半入臺圈
而半恃其強出守外土堡與虜鬪鬪死者三十
三人而臺圈無恙我兵得首虜凡八級死者六
人而城堡皆全此

天幸也實賴

皇上之靈也河東則叅政栗在庭副總兵楊燮聞虜

已西犯用降夷為耳目隨以義兵總之不過百騎耳渡河擊其情歸斬首虜二十七級以歸而我兵無所失此一奇也先後斬首虜凡四十二級奪獲達馬六十匹虜出而降夷家丁尾其後得其馬十有八匹而歸我軍先後為所殺虜者二十一名陣失馬一百一十三匹虜死傷無筭虜馬死亦無筭而其所殺畧邊屯者大都如前所稱夫虜之窺伺非不久糾聚非不衆意欲一大逞以甘心於遼即臣等亦謂其積憤蓄銳合謀併力而來不知遭其荼毒當何狀而先以三

千騎襲堡後以萬餘騎攻城皆失利最後衆以
八萬留邊內以五日而其得失大較若此遼人
咸以為從來虜滿萬入犯未有狐疑狼顧重重
自保不敢開營遠掠無所得而去若此番者今
宜以功

聞往如此類類以功

聞臣以為若鎮守總兵官李

分防赴援不啻若

拯溺救焚城堡要害以數十百精神無處不周
其所挾者寡而所全者多不可謂非功功反難
於塞外之捷而咸梁

國家重臣邊疆大帥世受

皇上之

恩無可為報其為人忠勇仁讓猶以不盡滅虜而保內地秋毫無損為恨退虜而還憔悴巡巡不忍自言功臣故不敢稱其功若分巡布政任天祚之悉心於收保寧前叅政劉易從之盡力於修防亦不過各舉其職耳臣亦不敢過為之敘及諸將勞績未著者俱不敢槩敘外其諸將校之拒守而得全救援而克濟與夫捕斬修築功勞最著者使不稍為優異何以酬今而勵後哉臣

謹為

皇上摘陳之如都督李平胡副總兵李興死戰全城者各再副總兵李寧死戰全城者一赴急解圍者再此三臣者功當首論而重加陞賞或陞格於例而以賞優之致仕副總兵李得全千總金尚禮李尚仁李繼武死戰全城者各一功當論次而重加賞賚叅將塗寬遊擊塗廣赴急解圍者各一功又次而當同加賞賚備禦楊四維以斬勁虜而威振守備高良弼以督降夷而功多千總金印以精火器而却虜功當論次與李得

全等守鎮夷堡指揮陳衛國當重加賞賚守戚
家堡指揮周勅當同加賞賚以勵沿邊之守堡
者至於叅政栗在庭副總兵楊燮出奇取勝於
塞外而內境晏然且示河東有備隱然保障之
功不細功當與李平胡等而優其賞仍紀錄以
俟後功併敘者也又如管正安堡車營遊擊事
副總兵姚大節管鎮靜堡守備事遊擊劉崇正
管義州叅將事遊擊黑雲龍管錦州遊擊事叅
將李文芹義州備禦栢朝翠守鎮夷堡指揮陳
衛國代守大興堡千戶鄒應龍守大福堡百戶

文盤守大鎮堡指揮趙桂賊之入犯雖其信地而外無險阻內無重兵本難堵遏又俱保全似應免寃令其加慎防冬內陳衛國仍當從前論功者也伏乞

勅下兵部查議照例轉行巡按御史將前項獲功陣亡人員及地方有無隱匿情弊并已前節次虜犯情由一併查勘明實徑自具

奏施行為此具本謹題請

旨

申明加餉未盡事宜

題為申明加餉未盡事宜以便支放以永遵守事
卷查先准兵部咨為極危孤鎮邊長虜衆兵寡
餉薄恭

進圖說懇乞

聖明御覽

特賜宸斷以遺久安事該臣等會

題本鎮軍丁加餉事宜該本部會同戶部覆議遼
左連年虜患諸軍士咸效死力督撫按臣請乞
增餉亦出萬不得已合無量為酌處該鎮家丁

四千五百名每人馬月加銀伍錢歲增銀二萬七千兩及查萬曆十三年該巡按御史陳登雲題稱遼鎮家丁攀報為害議將本官賊罰銀三千兩本鎮稅銀一千兩共四千兩以為河東家丁戍守河西衣甲盤費之用今既一槩加餉合將前銀抵湊今增之數扣銀四千兩實該發銀二萬三千兩選鋒軍四千名人馬月加銀三錢歲增銀一萬四千四百兩其餘軍士量於歲賞九錢外再加二錢共一兩一錢歲增銀一萬八千兩其南衛設兵防守歲加練兵糧賞馬料

銀一萬八千九百八十兩六分二釐五毫以上
通共增銀七萬四千三百八十兩六分二釐五
毫馬價免朋銀四萬七千八百餘兩如數增發
劄付太僕寺於常盈庫貯馬價銀內動支四萬
七千八百七十五兩連前次發銀七萬兩共十
一萬七千八百七十五兩俱為年例買補戰馬
支用等因題奉

聖旨遼鎮軍士防戰艱苦委當優恤這餉銀馬價准
照數增發還着督撫等官稽覈撙節務使軍需
實惠其餘俱依擬欽此欽遵備咨到臣除選鋒

軍士月加三錢闔鎮軍士歲加賞銀二錢金州
軍士加添糧賞土兵軍士糧料賞賜銀兩并增
發馬價俱無容別議外惟廣寧家丁加餉一節
河東西當有分別及欲將按臣贓罰銀三千兩
本鎮稅銀一千兩抵湊相應再為調停臣會同
總督薊遼保定等處軍務兼理糧餉都察院右
都御史兼兵部右侍郎王 議照頃者臣等請
益全遼軍餉而於正兵營家丁議之稍厚者蓋
欲使之長遠服役而免攀報之累也然攀報惟
河東家丁有之今人馬月益之以五錢而欲其

一旦弁丘墓離宗族親戚而揭其家以遠戍又永無還期也於人情為最難似其所加猶未足河西家丁征防非不苦然去其家較河東為近又本無攀報之例而加餉一如河東兵於人情猶有所未均故臣等復為之劑量群兩河家丁而面諭之河東者再量加銀一兩二錢歲共加銀七兩二錢河西者減半歲共加銀三兩六錢兩情悅服無有異言而通融裒益之間取給於部帑二萬三千之內而足可無藉按臣之贖鍰與本鎮之稅錢也此當明言者一也先是巡按

御史陳登雲題為孤鎮危急直陳利弊大端以裨安攘萬一事該戶部覆議將巡按衙門解部贓罰銀三千兩及本鎮魚鹽市稅銀一千兩共四千兩每年給賞戍守河西家丁以為衣甲之費再不許各丁恣意攀報致貽民害而贓罰三千兩係本鎮抵充年例之數乃欲管糧等官設法措處免增京運夫御史陳登雲之議蓋目擊河東攀報之累又念家丁征調之勞而當是時正諸臣鉗口結舌不敢以餉為言之末故不得已而以其贓罰為

請度不足而復益之以稅銀其意實望部臣如其數
增發也前此太倉豈獨難此三千金而以設法
措處責之管糧等官管糧等官所司錢穀幾何
况遼餉預食半年又徃徃後期至至則各道領
餉之官已坐而守管糧官不過驗封識無他一
分立盡於彼三千金又將何法以處也是若以
三千金益家丁而實損額餉矣譬諸損暮之四
益朝之三若為得宜而斷鶴之長續鳧之短實
則非便今家丁既已加餉則不必復與衣甲之
費部發既已調停而給則不必復取足於按臣

之贖鍰而按臣之贖鍰仍宜解管糧卽中使不
失年例之額至於本鎮稅銀多寡原無定數而
驗功犒賞馬市撫夷及各衙門一切不可已之
費皆取諸此而不足似仍宜聽本鎮公用者也
此當明言者二也又查得先該臣等會

題為

天威遠播夷酋率衆來降屢立斬獲功次乞

賜糧餉安插以便鼓舞等事內降夷精壯堪戰者
一百九十二名歲該糧賞料草銀四千二百四
兩八錢次壯男并婦女幼小七百一十九名口

歲該糧賞布花銀三千六十五兩一錢該戶部
議覆奉

聖旨這降夷精壯堪戰的月糧行糧等項准照該鎮
原擬支給其次壯男及婦女幼小著督撫官再
加查議作速具奏其餘依擬欽此除精壯降夷
已奉

明旨無容別議外其次壯男并婦女幼小仍該銀三
千餘兩查得新增河西家丁餉內尚有數百兩
贏餘其不足者即於全鎮逃故軍餉內通融支
給不必復

請諸太倉此當明言者三也夫昔當餉薄之時則其措處也難今當加餉之後則其措處也易一通融之間而按臣贖鍰與降夷應補之六千餘金皆可不仰於

內帑矣不然而請之不已是馮婦之操也臣等不忍為也部臣既能濟邊臣之急邊臣安得不量部臣之難伏乞

勅下戶部再加查議將家丁餉銀如臣等今次所擬照數支給以便造報稽查其按臣賊罰照舊解管糧卽中充為年例稅銀仍聽本鎮賞功撫夷

等項公用降夷次壯男并婦女幼小糧賞銀本
鎮自為通融其精壯降夷銀四千二百四兩八
錢每年隨年例銀

題發庶錢糧各有歸着而可永為遵守矣為此具
本謹題請

旨

廣寧備禦官員患病

題為患病備禦官員事據分巡遼海東寧道兼理
廣寧等處兵備山東布政使司右布政使任天
祚呈稱行據廣寧通判魯三近查得廣寧備禦
王咨臣於萬曆十三年閏九月內蒙兵部推陞
前職到任管事至萬曆十四年四月十九日偶
患喘疾調理至今未痊誠恐有曠厥職以此將
情呈要休致回籍似應准從緣由到道該本道
看得備禦王咨臣年資青敏才猷練達備煩劇
之地而任怨任勞勵廉靜之操而不苛不擾查

病果真論才可惜似應准其回衛調理員缺題
請推補候本官病痊之日另行推用等因到臣據此
案照先據廣寧備禦王咨臣呈前事已經批仰
該道查報去後今據前因臣會同總督薊遼保
定等處軍務兼理糧餉都察院右都御史兼兵
部右侍郎王 巡按山東監察御史王國弼
議照廣寧備禦王咨臣心誠事練守慎才通求
之武弁中甚為難得是以臣等於其初病容其
在任調理以冀痊可而用之不意抱病至今不
痊則衝邊武臣職難久曠相應准令回衛調理

查得廣寧左衛指揮僉事郭濟川賦材通敏任
事精勤條議諄諄恤軍矢志斤斤守已先任海
蓋備禦止以練兵不及分数論革原無大過相
應推用廣寧衛指揮使李都騎射優閑幹理精
爽守堡能禽逸賊修邊知恤疲軍以上二員俱
堪陞補廣寧備禦伏乞

勅下兵部再加查議將王咨臣准令回衛調理候病
痊之日另行推用員缺即以郭濟川等酌量推
補為此具本謹題請

旨

遼陽缺副總兵

題為急缺衝邊協守及查議將領等官以肅秋防
事據分守遼海東寧道兼理邊備山東布政使
司右叅政栗在庭稟稱遼陽副總兵楊燮於萬
曆十六年七月十四日巳時病故等因到臣除
行該道將副總兵兵馬事務行令遼東都司孔
東儒暫代外臣會同總督薊遼保定等處軍務
兼理糧餉都察院右都御史兼兵部右侍郎張
議照遼陽副總兵統轄河東地方大小將
領悉聽約束一切調遣分防皆得視緩急便宜

行之實為河以東主帥今歲秋防關西及馬市
回鄉人口之報並急調土蠻諸酋業已聚兵祭
旗意在必犯河東協守副將不可一日缺人查
得管正安堡車營遊擊事副總兵姚大節老成
持重之度周詳沉審之謀韜鈴素熟於胸中酋
虜可置諸掌上威望材武衆所推服彈壓河東
無有出其右者管海州叅將事副總兵孫守廉
賦質清臞而熟於戎機起家行伍而明於吏事
勇略安可以皮相功名皆得之身強以上二員
俱堪推補東路協守如用姚大節遺下員缺查

得管鐵嶺遊擊事叅將郭夢徵沉毅而識度不
群廉正而措注自別已見長才於歷任可屬大
事於將來正安堡乃廣寧鎮城要邊其所轄鎮
靜堡鎮遠關乃市夷出入之區稽查錢糧以杜
侵漁整飭兵馬以防巨測譯審市夷以探虜情
其責頗重非郭夢徵之才守兼優者不足以當
之鎮武堡遊擊蔣國泰偉貌出群誠心任事撫
疲卒悉沾實惠處衝邊竭盡苦心以上二員俱
堪調補正安堡遊擊如用郭夢徵仍以叅將管
遊擊事遺下員缺查得汎河備禦董文貴防禦

慎密脩守勤勞衝區盡三載之苦心要地堪一面之付託蒲河備禦趙之牧意氣精爽機宜明練志不安於小成材可期乎大用以上二員俱堪推補鐵嶺遊擊如用董文貴遺下員缺查得正兵營後哨千總金州衛署都指揮同知趙國禎氣壯敢於當鋒材長勤於幹理屢試而屢奏績數戰而數有功正兵營左哨千總廣寧左衛指揮僉事劉應德勇決不憚履危勤慎每能集事歷下已曾領餉直沽又復轉漕以上二員堪推補汎河備禦又查得鎮靜堡守備陳某往過

曾經指摘新遷未見作為志已墮而頗閏脂膏
體愈肥而不便鞍馬近有市夷到邊貪其貿易
小利留滯四日不報以致夷情壅闕譯審未明
邊關重務何所賴之應亟革任回衛另議推補
及查原任京營叅將三萬衛都指揮僉事戴良
棟邊務習練膂力精強機權素善於撫夷警敏
尤長於應變原任清河加銜遊擊王惟屏魁偉
之貌通練之才守邊曾立戰功督陣近收全捷
以上二員俱堪推補鎮靜堡守備內戴良棟本
以京營叅將革任或量加遊擊職銜管事或照

近例止起守備伏乞

勅下兵部再加查議將遼陽協守副總兵等官員缺
即以姚大節等酌量推補仍將陳 革任回
衛即以戴良棟等二員或量加銜或照近例起
用庶衝邊得人而秋防有賴矣為此具本謹題
請

旨

保留給由方面官員

題為保留給由賢能方面官員事據分巡遼海東
寧道兼理廣寧等處兵備山東按察司副使鮑
希顏呈蒙臣批據整飭寧前兵備山東按察司
僉事王邦俊呈稱本職見年三十六歲陝西延
安府鄜州人由進士萬曆三年二月除授四川
重慶府推官萬曆九年二月陞兵部職方司主
事本年十一月初十日到任給領

內府推字四號

精微批文及本部劄付管守山海關至萬曆十二年

十月初十日三年考滿復職萬曆十三年四月
十一日陞武選司署員外郎事主事次日到任
本年十月十五日陞車駕司署郎中事主事次
日到任萬曆十四年五月陞湖廣按察司僉事
本年八月十三日到任萬曆十五年八月初三
日調寧前兵備僉事因進

萬壽表文赴京本年九月初六日事竣領

勅出京本年十月初十日到任內除九月初七日起
至十月初九日止一箇月零二日不計外計自
十四年八月十三日起至十七年八月十五日

止連閏實歷俸三十六箇月三年例該考滿等
因蒙批仰分巡道查報又蒙巡按徐御史亦批
本道查報蒙此依蒙查得僉事王邦俊前項歷
俸年月相同例應將任內行過事蹟攢造牌冊
赴部給由看得本官力祛虛浮雅存實際當虜
騎之衝鋒不避艱險值軍情之洶湧綽有調停
邊塞長才巖廊重器值此地方多事若使離任
不無廢事相應保留等因備呈到臣據此卷查
嘉靖四十五年十二月內准吏部咨為優處邊
方官員以固疆圉事該本部文選清吏司案呈

照得遼東等九鎮兵備官員風霜艱險比之腹
裏兵備苦樂懸殊腹裏兵備三年考滿既得敘
遷又得善地邊方兵備三年考滿陞職止同腹
裏又多仍留在任若不破格優處非惟人情有
不均之嘆實於治體關涉不輕該本部議得前
項兵備官員若三年考滿保留到部查其任內
所管地方平時操練修築屯種果有成效有警
收斂隄備調遣果無疎失者是為卓異許陞二
級供職平常者止照常格遷敘等因題奉

欽依備咨前來欽遵外又查得萬曆四年五月內准

都察院咨為酌議邊臣考滿事例以昭激勸事
准吏部咨該本部題各邊兵備官員較之內地
勞逸本殊故三年考滿特從優敘以後三年考
滿本部查其人品政績果屬卓異者方得照例
陞銜仍舊供職平常無過者亦止照常敘遷等
因題奉

欽依備咨前來又經通行欽遵去後今據前因臣會
同總督薊遼保定等處軍務兼理糧餉都察院
右都御史兼兵部右侍郎張 巡按山東監

察御史徐元考得整飭寧前兵備山東按察司

食事王邦俊處衝邊實心任事值裁餉極力安
危品格不凡功勞最著茲當考滿例應赴部但
遼鎮最為孤懸而寧前尤全鎮之最衝僅以一
線之路西通山海外逼虜穴不數十里大舉零
竊何月無之本官經畧苦辛巨細畢賴封疆不
可一日少之難令給由離任相應遵例保留伏
乞

勅下吏部查議行令本官照舊供職止將攢造牌冊
送部查考應得

恩典照例

請給施行再照本官調任衝邊雖止二載艱難辛苦
實則萬狀操練修築禦虜救荒兩年之內絕無
一日休暇不獨緩急時有也即近時稍議裁餉
軍情洶洶非本官調停彈壓將不知其所終矣
稽其政績足稱卓異臣等先是於叅政栗在庭
之考績嘗以卓異稱之矣而今又以屬王邦俊
非敢市恩於諸臣也蓋遼左之難

皇上素所洞燭諸臣才望不著不以調之遼左今其
勞苦功高並著乃有所顧忌聶需而不以上
聞是没人善而負

皇上任人之

盛心也故不敢以遠嫌故而蹈蔽賢之罪也伏候

聖明裁奪為此具本謹題請

旨